



Կարգապահական գործ թիվ ԿԳ-19140

Հայաստանի Հանրապետության փաստաբանների պալատի խորհրդի
2020 թվականի փետրվարի 4-ի թիվ 36-րդ ԿԳ նիստի

Ո Ր Ո Շ ՈՒ Մ ԹԻՎ ԿԳ/32-Ա

ՓԱՍՏԱԲԱՆ ՌՈՒԶԱՆՆԱ ԳԱԲՈՅԱՆԻՆ ԿԱՐԳԱՊԱՀԱԿԱՆ ՊԱՏԱՍԽԱՆԱՏՎՈՒԹՅԱՆ ԵՆԹԱՐԿԵԼՈՒ ՀԱՐՑԸ ՔՆՆԱՐԿԵԼՈՒ ՄԱՍԻՆ (ԱՆԴԱՄԱՎՃԱՐԻ ԳՈՐԾՈՎ)

Հայաստանի Հանրապետության փաստաբանների պալատի (**այսուհետ նաև՝ Պալատ**) խորհուրդը (**այսուհետ՝ նաև խորհուրդ**), նիստը նախագահող՝ Հարություն Հարությունյանի, խորհրդի անդամներ Կարապետ Աղաջանյանի, Մելանյա Առուստամյանի, Սիմոն Բաբայանի, Գայանե Դեմիրջյանի և Կարեն Մեժլումյանի կազմով,

քարտուղարությամբ՝ Մարիամ Պետրոսյանի,
քննության առնելով փաստաբան Ռուզաննա Գաբոյանին (արտոնագիր՝ թիվ 212) կարգապահական պատասխանատվության ենթարկելու վերաբերյալ հարցը,

Պ Ա Ր Զ Ե Ց՝

1. Կարգապահական վարույթ հարուցելու առիթը և հիմքը.

Համաձայն ՀՀ փաստաբանների պալատի գլխավոր հաշվապահի կողմից 16.07.2019թ. տրամադրված տեղեկանքի՝ փաստաբան Ռուզաննա Գաբոյանն ունի 100.000 (մեկ հարյուր հազար) ՀՀ դրամ գումարի չափով՝ 2017 թվականի սեպտեմբերից 2019թ. ապրիլ (ներառյալ) ամիսներն ընկած ժամանակահատվածի համար անդամավճարի մուծման չկատարման պարտավորություն:

2. Կարգապահական վարույթ հարուցելու մասին որոշումը.

01.08.2019թ. ՀՀ փաստաբանների պալատի նախագահի առաջին տեղակալի թիվ 305-Ա/ԿԳ-19140 որոշմամբ կարգապահական վարույթ է հարուցվել փաստաբան Ռուզաննա Գաբոյանի կատմամբ՝ «Փաստաբանության մասին» ՀՀ օրենքի (**այսուհետ՝ նաև Օրենք**) 17-րդ հոդվածի 4-րդ մասի, 19-րդ հոդվածի 1-ին մասի 5-րդ կետի և Պալատի ընդհանուր ժողովի կողմից 11.02.2012թ. թիվ 1/4-Լ որոշմամբ հաստատված Փաստաբանի վարքագծի կանոնագրքի (**այսուհետ՝ նաև Կանոնագիրք**) 2.9.1 ենթակետի խախտման հատկանիշներով:

Սույն կարգապահական գործը 08.08.2019թ. հանձնվել է Պալատի խորհրդին: Խորհրդի նիստերը տեղի են ունեցել 17.12.2019թ., ժամը 19:52-ին և 04.02.2020թ., ժամը՝ 19:12-ին ՀՀ փաստաբանների պալատի վարչական շենքում (ք.Երևան, Զաքյան 7-2, 4-րդ հարկ 12 սենյակ):

3. Պատասխանողի համառոտ բացատրությունները.

12. 08. 2019թ. Պալատ է մուտքագրվել փաստաբան Ռուզաննա Գաբոյանի դիմումը, որով վերջինս խնդրել է անդամավճարի իր պարտքը զիջել (ներել) երկարատև հիվանդության հիմքով՝ հիվանդության տևողության ժամանակահատվածով: Դիմումին կից ներկայացրել է հիվանդության առկայության փաստը հաստատող փաստաթղթեր:

17.12. 2019թ. Պալատ է մուտքագրվել փաստաբան Ռուզաննա Գաբոյանի դիմումը, որով վերջինս հայտնել է, որ 2018 թվականից ունի քաղցկեղ և որ նյութական պայմաններից ելնելով հնարավորություն չունի կատարել անդամավճարի գոյացած պարտքի վճարումը, և նույնիսկ հնարավորություն չունի շարունակել անհրաժեշտ բուժումը: Դիմումով Ռուզաննա Գաբոյանը, խնդրել է զիջել իր անդամավճարի պարտքը:

Փաստաբանը թեև պատշաճ ծանուցվել էր կարգապահական նիստի վայրի, օրվա և ժամի մասին, սակայն Խորհրդի նիստին չի ներկայացել:

4. Գործի հանգամանքները՝ առկա ապացույցների վկայակոչմամբ.

Պալատի խորհուրդը, ուսումնասիրելով գործում առկա գրավոր փաստաթղթերը, հաստատված է համարում հետևյալ փաստերը.

- 1) փաստաբան Ռուզաննա Գաբոյանը փաստաբանական գործունեության արտոնագիր է ստացել 18.08.1988թ. (հաստատվում է Պալատի ընդհանուր դեպարտամենտի ղեկավարի կողմից տրամադրված տեղեկանքով),
- 2) փաստաբան Ռուզաննա Գաբոյանն ունի 100.000 (մեկ հարյուր հազար) ՀՀ դրամ գումարի չափով 2017 թվականի սեպտեմբերից 2019թ. ապրիլ (ներառյալ) ամիսներն ընկած ժամանակահատվածի համար անդամավճարի մոծման չկատարման պարտավորություն (հաստատվում է Պալատի գլխավոր հաշվապահի կողմից 16.07.2019թ. տրամադրված տեղեկանքով),
- 3) Պալատի Խորհրդի 14.01.2020թ. թիվ 1/13-Ա որոշմամբ փաստաբան Ռուզաննա Գաբոյանի անդամավճարի պարտքը ամբողջությամբ զիջվել է (ներվել է) (հաստատվում է Պալատի Խորհրդի 14.01.2020թ. թիվ 1/13-Ա որոշմամբ):
- 4) փաստաբան Ռուզաննա Գաբոյանի անդամավճարի պարտքը 2017 թվականի սեպտեմբերից 2019թ. ապրիլ (ներառյալ) ամիսներն ընկած ժամանակահատվածի համար Պալատի կողմից զիջվել է (ներվել է) (հաստատվում է Պալատի գլխավոր հաշվապահի կողմից 04.02.2020թ. Խորհրդին տրամադրված տեղեկանքով):

5. Պատասխանողի անձը բնութագրող հանգամանքները.

Պալատի ընդհանուր դեպարտամենտի ղեկավարի կողմից տրամադրված

տեղեկանքի համաձայն՝ Ռուզաննա Գաբոյանի (արտոնագիր՝ 212, ստացված՝ 18.08.1988թ.) նկատմամբ 2013-2020թթ. ընկած ժամանակահատվածում կարգապահական վարույթ չի հարուցվել (չհաշված սույն կարգապահական վարույթը):

6. Պալատի խորհրդի պատճառաբանված եզրակացությունը և որոշումը.

Հիմք ընդունելով Պալատի խորհրդի կողմից հաստատված փաստերը, դրանք հիմնավորող գործում առկա ապացույցները և քննարկվող իրավահարաբերությունները կարգավորող կանոնները՝ Պալատի խորհուրդը գտնում է, որ փաստաբան Ռուզաննա Գաբոյանի նկատմամբ կարգապահական գործի վարույթը ենթակա է կարճման հետևյալ պարճառաբանությամբ.

Օրենքի 17-րդ հոդվածի համաձայն՝ փաստաբանը փաստաբանների պալատի սահմանած չափով և կարգով մուծում է անդամավճար՝ փաստաբանների պալատի ընդհանուր պահանջների և փաստաբանական գործունեության իրականացման հետ կապված այլ ծախսերի համար: Նույն օրենքի 19-րդ հոդվածի 1-ին մասի 5-րդ կետի համաձայն՝ փաստաբանը պարտավոր է մուծել անդամավճարներ:

Համաձայն Կանոնագրքի 2.9.1. կետի. «Փաստաբանը պարտավոր է սահմանված կարգով և չափով Պալատին վճարել անդամավճար»:

Համաձայն ՀՀ փաստաբանների պալատի խորհրդի 26.12.2013թ.-ին թիվ 33/6-Լ որոշմամբ ընդունված «Անդամավճարների, մուտքի և այլ վճարների վճարումների վերաբերյալ կարգի» **(այսուհետև նաև՝ Կարգ)** 7-րդ կետի՝ փաստաբանները յուրաքանչյուր ամսվա համար անդամավճարների վճարումը կատարում են հաշվետու ամսվան հաջորդող ամսվա մինչև տասնհինգը, իսկ նույն Կարգի 21-րդ կետով սահմանվում է՝ «Ամենամսյա վճար վճարելու պարտականությունը խախտելու համար փաստաբանը կամ օգնականը ենթակա են կարգապահական պատասխանատվության»:

Համաձայն Կարգի 14-րդ կետի «ա» ենթակետի. «Պալատի խորհրդի որոշմամբ փաստաբանին կարող է տրամադրվել հետևյալ արտոնությունը՝ ծանր հիվանդություն ունեցող փաստաբանին՝ անդամավճարի պարտքի զիջում (ներում) և/կամ ամենամսյա անդամավճարից լրիվ մասով ազատում հիվանդության տևողության ժամանակահատվածով՝ դիմում և առողջական վիճակը հավաստող համապատասխան բժշկական փաստաթղթեր ներկայացնելու դեպքում»:

Վերոնշված կանոնների վերլուծությունից հետևում է, որ սահմանված ժամկետներում անդամավճար չվճարելու համար փաստաբանը ենթակա է պատասխանատվության, եթե առկա չէ Կարգի 14-րդ կետի «ա» ենթակետով սահմանված հիմքը:

Սույն դեպքում 12.08.2019թ. և 17.12.2019թ. Պալատ է մուտքագրվել փաստաբան Ռուզաննա Գաբոյանի դիմումները, որով վերջինս խնդրել է անդամավճարի իր պարտքը զիջել (ներել) երկարատև հիվանդության հիմքով՝ հիվանդության տևողության ժամանակահատվածով: Համաձայն Դիմումին կից ներկայացվել են հիվանդության առկայության փաստը հաստատող փաստաթղթեր: Պալատի խորհրդի 14.01.2020թ. թիվ 1/13-Ա որոշմամբ փաստաբան Ռուզաննա Գաբոյանի դիմումը բավարարվել է:

Համաձայն ՀՀ փաստաբանների պալատի գլխավոր հաշվապահի 04.02.2020թ.-ի տեղեկանքի՝ փաստաբան Ռուզաննա Գաբոյանի անդամավճարի պարտքը 2018թ. թվականի հունվարից 2019թ. ապրիլ (ներառյալ) ամիսներն ընկած ժամանակահատվածի համար Պալատի կողմից զիջվել է (ներվել է)

ՀՀ Փաստաբանների պալատի ընդհանուր դեպարտամենտի ղեկավարի կողմից տրամադրված տեղեկանքից հետևում է, որ փաստաբան Ռուզաննա Գաբոյանի նկատմամբ նախկինում կարգապահական վարույթ չի հարուցվել՝ բացառությամբ սույն կարգապահական վարույթի:

Ելնելով վերոշարադրյալից և ղեկավարվելով «Փաստաբանության մասին» ՀՀ օրենքի 10-րդ հոդվածի 5-րդ մասի 14-րդ կետի, 39-րդ հոդվածի 1-ին մասի, 39.7. հոդվածի 5-րդ մասի 2-րդ կետի պահանջներով՝ Պալատի խորհուրդը

Ո Ր Ո Շ Ե Ց '

1. Փաստաբան Ռուզաննա Գաբոյանի (արտոնագիր՝ թիվ 212) նկատմամբ հարուցված կարգապահական վարույթը կարճել:

2. Պալատի աշխատակազմի ղեկավարին հանձնարարել՝ սույն որոշման մասին իրազեկել փաստաբան Ռուզաննա Գաբոյանին:

Ծանոթություն. Սույն որոշումը կարող է բողոքարկվել դատական կարգով՝ որոշումը ստանալու օրվանից՝ մեկամսյա ժամկետում: Սույն որոշումն ուժի մեջ է մտնում բողոքարկման համար սահմանված ժամկետն անցնելուց հետո:

ՀՀ փաստաբանների պալատի խորհրդի
կարգապահական գործով
նիստը նախագահող՝

Հարություն Հարությունյան

**04 փետրվարի 2020թ.
թիվ ԿԳ/32-Ա
ք. Երևան**